

La pbd vul surpigliar vinavant responsabladad

Radunanza da delegadas e delegads da la Partida burgais-democratica a Zezras

■ (mc) Il scandal da cartel da construcziun en Engiadina Bassa ha scurlatà fitg la Partida burgais-democratica dal Grischun en vista a las elecziuns vegnentas. Quest tema è natiralmain era vegnì tematisà a l'ultima delegada che ha già lieu dacurt a Zezras. En il center da la radunanza èn stadas las parolas per las votaziuns federalas ed in discurs al podì davart l'integraziun e la solidaritad. En ses pled introductiv ha il viceparsura *Bernhard Niggli* tematisà il tema da las cunvegientschas da cartel ch'han scurlatà la partida las ultimas emnas. Tuts dus candidats da la pbd èn stads en il center da la discussiun publica. *Andreas Felix* pervi da sia rolla sco mainagestiu da l'Associaziun grischuna dals impressaris e *Jon Domenic Parolini* en connex cun sia anteriura activitad sco capo communal da Scuol. Enconuschentamain ha Felix la finala renunzià a sia candidatura per la regenza. «Nus avain surpiglià fin quà responsabladad e vegnin er a far quai en l'avgnir», ha punctuà Niggli. I sa tractia uss da sa concentrar sin las fermezzas da la partida e da far enconuschent ad in publicum pli vast quai ch'ins haja cuntanschì en il decurs dals ultims onns. Sco terzgronda fracziun en il cussegl grond e cun numerus mandataris en gremis communal, chantunals e nazionals haja la partida influenzà numerusas decisiuns da la politica grischuna. Il giavisch da tschertgar la raschunavladad politica e soluziuns persistentas saja vinavant actual. Perquai saja la direenziun politica en vista a las elecziuns avant porta clera: «Vinavant.»

Sa distanziar dals rampins, dentant betg sentenziar prematuradamain

Il parsura ad interim *Bernhard Niggli* punctuescha en ses votum expressiva-



Participants al discurs da podì da la Partida burgais-democratica dal Grischun: Cussegliev guvernativ *Jon Domenic Parolini*, *Daniel Zindel*, *Martin Bässler* e *Manuela Tscholl* (da san.).

MAD

main: «La dimensiun da las cunvegientschas da cartel ha surprendì nus tuts e demussa ina tenuta senza scrupels. La pbd dal Grischun sa distanziescha claramain da tals rampins.» Tenor sia opiniun saja uss l'obligaziun da spetgar il rapport da la cumissiun da concorrenza per alura pigliar las dretgas consequenzas. Niggli punctuescha ch'i na saja en il mument betg giustifitgà d'anticipar ina sentenzia mo sin fundament d'expectaziuns persunalas e da rapports da medias tendenzius. Er ulteriurs referents han crititgà en quest connex la tenuta da las medias.

Il manader dal cumbat electoral *Gian Michael* ha tematisà en ses votum las prognosas electoralas ch'èn vegnidas fatgas sin fundament d'ina retschertga cuminaivla da Somedia ed RTR. Tenor questa retschertga cuntanschess il candidat da la pbd *Jon Domenic Parolini* il pli flavel resultat dals cussegliers en uffizi, fiss dentant tuttina elegi. Suentar las grondas rinfatschas e la polemica da l'ultim temp en connex cun ils cartels da construcziuns na fetschia quest resultat betg surstar, di *Michael*. Surstà e trumpà è *Michael* dentant pervi dal fatg che ra-

dund 20 pertschient dals electurs da la pbd n'han betg sustegnì l'agen candidat. I saja uss l'incumbensa dals exponents da la pbd da metter la lavur da *Parolini* en la dretga glisch. Sche quai resusseschia la finala, quai vegnia alur a sa mussar ils 10 da zercladur.

Parolas per las votaziuns federalas

Suandond las recumandaziuns dal candidat da deputà *Stefan Joos* (Tschintg Vitgs) èn delegadas e delegads s'exprimids unanimamain cunter l'iniziativa per il daner cumplain. Il referent è da l'avis che quest

experiment ristgà na mettia betg mo en privel l'indipendenza da la Banca nazionala, mabain effectuaschia era ch'ils manaschis pitschens e las persunas privatas vegnessian engrevgiads pli fitg tras hipotecas e credits essenzialmain pli chars.

Cun 32:12 vuschs ha la pbd decidi la parola gea per la lescha federala davart gieus per daners. Delegadas e delegads han suandà cun gronda maioritad la recumandaziun da cussegliev guvernativ *Parolini* ch'ha accentuà che la lescha garanteschia vivint il sistem cumprovà dals gieus da daners controllads e limitads. Lur retgavs sajan ina contribuziun indispensabla per projects d'interess general sin ils champs da la cultura, dal socialeser, dal sport, da l'ambient e da la AVS.

Quanta solidaritad dovra il stadi?

En ina discussiun da podì èn il manader da la purschida pedagogica da la fundaziun «Gott hilft» *Martin Bässler*, la menadra da *Tscholl Integration*, candidatas e candidats dal circul da Trin sco er il schef dal departament d'economia publica e fatgs socials *Jon Domenic Parolini* s'exprimids davart la dumonda: «Quanta solidaritad dovra il stadi?»

Cussegliev guvernativ *Parolini* e la candidata per il cussegl grond *Manuela Tscholl* han punctuà la necessitad d'integrar giuvenils cun difficilas cundiziuns da partenza en il process da lavur. Els renconuschian en quest connex cunzunt il fatg che numerus patrums èn pronti da far in sforz supplementar en quest grà. Gronds merits per l'integraziun haja era la fundaziun «Gott hilft». Suentar la discussiun han *Daniel Zindel* e *Martin Bässler* dà la pussaivladad da far ina visita guidata tras l'exposiziun «Gott hilft» intermediond uschia ina buna invista en las activitads meritavlas da questa instituziun sociala.